

## **BALUWA YA KAIDI YA PAULO KWA WAKOLINTO ULONGOZI**

Baluwa ya kaidi kwa Wakolinto yawandikagwa ni msigilwa Paolo mgati mo mhilimo wa 55 AD (1:1). Ino ni yakaidi mwe izibaluwa za-kwe mbili chinanazo ziwandikwe ni Paolo kwe bunga dya wamzumile Kulisito uko Kolinto. Wasomile wazumila kugamba Paolo kulongozi uko awandikaga baluwa kwa Wakolinto. Hachina chikudaha kulagisa ibaluwa ino atimlize 2:3-4. Baluwa ya kaidi ya Paolo kwa Wakolinto vyaligana kugamba yawandikagwa umo ekekala Makedoniya (2:13).

Baluwa ya kaidi ya Paolo kwa Wakolinto yesimisa kwaviya ni chimntu vitendese naho ya chimoyomoyo. Paolo atambalisa chinyemi chakwe chikulanga ulosi wedi ahokele kulaila kwa Tito ukulanga bunga dya wamzumile Kulisito uko Kolinto. Mwe baluwa ino chawona pwillili mahinyo jejeje alavize kulaila Lagano hya, hantu Paolo akulavya malagiso wachisanye hela zigalwe zikambize wamzumile Kulisito komzi wa Yelusalemu (8-9). Vyawoneka kugamba wawoni wadanti wamwenga kulaila kuse kwedibunga dya wamzumile Kulisito wajeseza usankani wa wantu wasiku mwe idibunga dya wamzumile Kulisito wamhige Paolo kwa ulozo wawo. Nendile wajela nkama udahi wa Paolo, uwo mafani usunguza kumtenda atoge chin-

dendedi mo udahi wakwe engu msigilwa ywa Yesu Kulisito kuhinga ko uhelo we baluwa ya kaidi ya Paolo kwa Wakolinto.

### **Vimndani**

Paolo akonga kwa kuwalamsa wantu wa bunga dya wamzumile Kulisito (1:1-7).

Ukajika atamwila kulanga mihitwile yo mwalo we ntambo yakwe na ulosi ahokele kuwalanga wowo na ivyo wakungwa wadamanye kuligana ne baluwa ye nkongo (1:8-7:16).

Ukajika aho Paolo alavya malagiso ya kuchisanya hela kwa chausa cha wamzumile Kulisito wa Yelusalemu (8:1-9:15).

Uhelo Paolo alavya fingo kwa wasigilwa weyawe na kuwenka mafundo mo utafi wakwe ukwiza (10:1-13:10).

<sup>1</sup> Miye Paolo msigilwa ywa Kulisito Yesu kwa ungi wa Chohile na mlukolo Timoseo chawalam-sani, chawawandikilani,

Bunga dya wamzumile Kulisito wa uko Kolinto, na kwa wantu wa Chohile wose mwe isi yoseni ya mkoa wa Akaya.

<sup>2</sup> Chohile Tati yetu na Zumbe dyetu Yesu Kulisito awawoneleni mbazi na utondowazi.

### *Paolo amhongeza Chohile*

<sup>3</sup> Chohile Tati ywa Zumbe dyetu Yesu Kulisito atogolwe, Tate ywa mbazi, Chohile mwambizi wa suwe choseni!

<sup>4</sup> Achambiza mwe nkunto zetu zoseni, vikuleka chikudaha kuwambiza watuhu wata nkunto zoseni ze simile, kwa wambizi uduya chihokele kwa Chohile.

<sup>5</sup> Iviya masulumizo ya Kulisito yakutendeswa mwetu, niivyo navyo Chohile akuchambizisa kwa sila ya Kulisito.

<sup>6</sup> Uneva chikasulumila, ni kwa wambizi na kuhonywa kwenyu. Uneva chambizwa, nyuwe nanywi mwambizwa nakujelwa nguvu ya kujijimiza na ugoji wa masulumilo ayadya suwe chikusulumila.

<sup>7</sup> Elo msuhi wetu utoga, kwaviya chivi-  
manya kugamba saviya mkutenda hamwenga mwe masulumizo yetu, niivyo navyo mkutenda hamwenga mwe kujelwa moyo.

<sup>8</sup> Walukolo weyangu, chaunga mmanye nkunto chipatile mo mkowa wa Asiya. Nkunto izo zikulisa kwetu kujinka nguvu zetu vyaleka chifa chevu cha kwikala.

<sup>9</sup> Nachikala saviya wantu wakantilwe file, chani chihinywe kumsinya Chohile akuyusa wantu, chikaleka kwesinya wenye.

<sup>10</sup> Uyo kachihonya mwe nkondo nkulu ya file, naho nachihonye, msuhi wetu suwe nikugamba nachihonye naho.

<sup>11</sup> Umo mkachambiza kwa malombezo, nivyo vikunga chani malombezo yalozize yakahit-ulwa, Chohile naye nachijimbike, naho walozize nawamhongeze Chohile kwachausa chetu.

### *Paolo ahitwila viya aungile kujesa*

<sup>12</sup> Mbuli chikwefenyeza nino, ukuzi wetu mwe umanyi wa kusagula kugamba kwa ulenguso na ung'azi wa myoyo kulaila kwa Chohile, suko kwa umanyi wa chimwili mna kwa wedi wa Chohile chikala mwe isi vitendese mwenyu.

13 Chawandika kwenyu viya mkudaha kusoma na kukombaganya. Nina msuhi kugamba namkombaganye vyedi vidala,

14 kwaviya kubula haluse mwakombaganya hadodo du. Chivimanya kugamba namwize mchikombaganye vyedi, chani mwe dizuwa dya Zumbe dyetu Yesu mkachefenyeza saviya suwe chikunga nachitende kwenyu.

15 Nami hatenda na msuhi uwo nasunga kubula kwenyu aho nkongo, chani mjimbikwe kaidi.

16 Nasunga kuwatalamkilani umo ni mwe sila kubula ko mkowa wa Makedoniya naho umo naho hauya, chani mnambize mwe ntambo yangu kubula Yudeya.

17 Togola, umo haliganya vino, nasitenda ki-hituhitu? Hegu ayo huliganya, nayaliganya chimntu kugamba nalonga “Heye” na “Bule” aho?

18 Chohile ni mkanuni, chiwagambile nyuwe siyo mbuli ya “Heye” na “Bule.”

19 Kwaviya Yesu Kulisito, Mwana ywa Chohile, miye Siliwano na Timoseo, chimlonga kwenyu, nasuyo mntu ywa “Heye” na “Bule”, mna uyo mazuwa yoseni ni “Heye” ya Chohile,

20 kwaviya ni “Heye” kwa ndagano zose za Chohile. Vino nivyo vikuleka “Taile” yetu yalongwa kwa sila ya Yesu Kulisito kumwinka Chohile Ukulu.

21 Chohile mwenye nuyo akuchitogeza suwe na nyuwe mo kulungana na Kulisito, naho nuyo akuchihaka mavuta yalenguke,

22 achijeile hula dyakwe, naho achinkile Muye

wa Chohile mwe myoyo yetu chani chilajiso kwa yadya yoseni achikiye.

<sup>23</sup> Chohile nuyo akuniukwila, kamanya umoyo wangu! Sizile vituhu Kolinto kwa kuwawonelani mbazi.

<sup>24</sup> Hachikunga kuwakankalisa mwo uzumizi wenyu, chivimanya kugamba mtoga mwe viya mkuzumila. Mna chadamanya ndima hamwenga na nyuwe kwa kwelelwa kwenyu wenye.

## 2

<sup>1</sup> Ivyo, siviwona nisekuwatalamkilani vituhu ninase kuwajelani chinyulu.

<sup>2</sup> Elo uneva ninawajela chinyulu, niyuhi akunga anitende nelelwe? Naawadya niwajeile chinyulu.

<sup>3</sup> Vino nivyo vilekile nawawandikilaga baluwa, savyungile kwiza kwenyu nakujelwa chinyulu ni wantu awo wakungwa wanelele. Kwaviya sivimanya kugamba umo nelelwe, nyuwe woseni nanywi mwelelwa.

<sup>4</sup> Nawawandikilaga kwa chinyulu na nkunto haila mesozi yalozize, siyo kwa kuwawonelani chinyulu nyuwe, mna chani mmanye ivyo huwaungisa.

### *Kulekeilwa kwa Mta masa*

<sup>5</sup> Uneva kuna mntu amjeile chinyulu mtuhu, hanijeile chinyulu miye, mna kawajelani chinyulu nyuwe wose, seiviya sikunga hatendendesa na maya.

<sup>6</sup> Kanto akantilwe ni walozize wenyu dya chinta.

<sup>7</sup> Isigaile ni nyuwe mkulekeilwa masa mntu uyo na kumwinka moyo chani asekwiza kwingilwa ni chinyulu na kuwonesa chevu.

<sup>8</sup> Ivyo naweilani nyuwe mtende kugamba mwamungisa mtu yudya.

<sup>9</sup> Vilekile hawandika ibaluwa idya ni kunga kumanya hegu mwemalanya vyedi kwiva chila mbuli.

<sup>10</sup> Mkamlekeila mntu masa yakwe, miye nami namlekeila. Kwaviya icho nimlekeile, uneva hana chochose cha kulekeilwa, nalekeila kulongozi kwa Kulisito kwachausa chenyu.

<sup>11</sup> Chadamanya vino chani chisekulumwa ni Shetani, kwaviya chimanya fanyanyi zakwe.

### *Nkwina za Paolo uko Tilowa*

<sup>12</sup> Umo hengila mo mzi wa Tilowa kulonga Mbuli Yedi ya Kulisito, Zumbe kanivuguila ulwivi mo kudamanya ndima uko.

<sup>13</sup> Mna moyo wangu nahautondowale kwaviya nasamwone mlukolo ywetu Tito. Ivyo siwalaga wantu kudya nakwita Makedoniya.

### *Uhuma mwa Kulisito*

<sup>14</sup> Mna Chohile ahongezwe akuchilongoza mazuwa yoseni mwe ntambo ya uhuma wa Kulisito. Uyo achitenda chilonge ichindedi cha Kulisito saviya mhempe wedi chila hantu.

<sup>15</sup> Kwaviya suwe ni saviya mhempe wedi wa ubani udya Kulisito akumlaviza Chohile, mhempe wedi ukuwabwila woseni, wakuho-nywa na wakwaga.

<sup>16</sup> Kwa wadya wakwaga, mhempe uwo ni file, mna kwa wadya wakuho-nywa, mhempe uwo

ni ujima. Elo niyuhi, akudaha kwambiza mwe ndima seiyo?

<sup>17</sup> Suwe hachikwinga watuhu wadya waku-damanya mayombe na ulosi wa Chohile, suwe chalonga kwa uchumi kulongozi kwa Chohile, saviya wantu chisigilwe ni Chohile, chikatenda chilungana na Kulisito.

### 3

#### *Wandima wa Lagano hya*

<sup>1</sup> Togolani, chakonga naho chikeduvya wenye? Togolani, mwachunga baluwa ya kwewagiza, hegu kulaila kwenyu, saviya wantu watuhu?

<sup>2</sup> Nyuwe wenye mwi baluwa yetu, baluwa iwandikwe mwe myoyo yetu ikumanyika na kusomwa ni wantu wose.

<sup>3</sup> Ni pwilili kugamba nyuwe mwi baluwa ya Kulisito aigale kwa mikono yetu. Kulisito kawandika baluwa kwa Muye wa Chohile mta ujima, siyo kwa wino, kaiwandika mwe myoyo ya wantu, siyo mwe mabendu ya mayuwe.

<sup>4</sup> Chalonga ayo kwaviya china msuhi kwa Chohile kujinkila Kulisito.

<sup>5</sup> Siyo kugamba suwe chadaha kudamanya chochose kwa udahi wetu wenye, mna udahi wetu wose walaila kwa Chohile.

<sup>6</sup> Uyo nuyo achidahize kutenda wandima we dilagano hya, sidyo dya sigilizi iwandikwe, mna, lagano dya Muye. Kwaviya sigilizi iwandikwe yegala file, mna Muye wa Chohile wegala ujima.

<sup>7</sup> Sigilizi yaikagwa kwa kuwandikwa mwe mabendu ya mayuwe. Hatahegu uhelo wakwe utenda file, ukulu wakwe nendile ukulisa hata

Waizulaeli wadunduga kuusinya uso wa Musa kwachausa cha mmweko wa kulenguka uso wakwe. Hata ivyo mmweko wa ulenguso uwo nasuwo wakutoga. Elo hegu ndima ya chiya chiletile file idamanyika kwa ulenguso ulozize sauwo,

<sup>8</sup> ndima ya Muye wa Chohile ina ulenguso ukulise.

<sup>9</sup> Elo hegu, kuna ulenguso mwe ndima igale nkanto, ni pwilili kugamba ndima ya wedi naitende na ulenguso ukulise.

<sup>10</sup> Haluse ulenguso ukulise wikaila udyia wezaga aho nkongo, ulenguso ujinkile hautendaga na ukulu sauno wizile haluse.

<sup>11</sup> Kwaviya uneva chiya chandile cha chipindi du nendile china ulenguso wakwe, ni pwilili kugamba chiya chikwikalisa mazuwa yose naitende na ulenguso mkulu vidala.

<sup>12</sup> Kwaviya china msuhi uno, suwe chalonga hechina woga.

<sup>13</sup> Suwe hachikale saviya Musa egubikaga uso wakwe kwa ngubiko chani wantu wa Izulaeli wasekuwona udyia mmweko wa ulenguso ukufifiya.

<sup>14</sup> Mna fanyanyi zawo zigubikwa, hata dyelo dino dikasomwa Lagano dya kale, ngubiko iyo icheyaho. Ngubiko iyo nayuswe du mntu akalungana na Kulisito.

<sup>15</sup> Hata vino dyelo chila ikasomwa Sigilizi ya Musa fanyanyi zawo zichei zigubikwa mwe myoyo yawo.

<sup>16</sup> Mna, umo mntu akamhitukila Zumbe, ngubiko iyo yauswa.

<sup>17</sup> Hano “Zumbe” ni Muye, na hadya eli Muye wa Zumbe naho wili ulekeilwa.

<sup>18</sup> Ivyo, suwe wadya izinyuso zetu hezigu-bikwe, chawona saviya mwe chelole, ulenguso wa Zumbe, chahitulwa chiliganise na uwo umliganyo wakwe kwa ulenguso ulozese. Ivyo nindima yakwe Muye wa Zumbe.

## 4

### *Mpamba mwe Nyungu*

<sup>1</sup> Elo Chohile, kwa mbazi zakwe, kachinka ndima ino na hachi kufachevu.

<sup>2</sup> Mna chilemela mbuli za soni zefisize, naho hachikujenda mwe ubafu hegu kuhangaya ulosi wa Chohile na lulimi. Mna chalavyanya pwilili ichindedi chelagisa kugamba chila uwagilwa kwa Chohile na umanyi wa kusagula yedi wa wantu zikuukulwa kulongozi kwa Chohile.

<sup>3</sup> Mna uneva Mbuli Yedi ya Kulisito chikulonga yefisa, yefisa du kwa wadya wakwaga.

<sup>4</sup> Awo hawakuzumila kwaviya Shetani yudya mnungu ywe isi kazijela chiza fanyanyi zawo wasekuwona vyedi ung'azi wa Mbuli Yedi ya ulenguso wa Kulisito, yudya mliganyo uchintile wa Chohile.

<sup>5</sup> Kwaviya hachikwelongela suwe wenye, mna chamlonga Yesu Kulisito eli Zumbe, suwe wenye chikatenda wandima wenyu kwachausa cha Yesu.

<sup>6</sup> Chohile yudya alongile, “Ulangazi ulangaze kulaila mwe chiza,” nuyo mwenye akwilangaza myoyo yetu, na kuchinka ukuka wa umanyi wa

ulenguso wa Chohile ukulangaza mo uso wa Yesu Kulisito.

<sup>7</sup> Elo, suwe china mpamba ino nisaviya viya vya ulongo, chani viwoneke pwilili kugamba nguvu iyo nkulu yalaila kwa Chohile siyo kwetu suwe wenye.

<sup>8</sup> Chimwe nkunto mazuwa yose, mna hachikuminywa, hamwenga mwe woga, mna hachikufachevu,

<sup>9</sup> chasulumila, mna hachikuswesa wambizi, naho hata uneva chigwiswa, hachibalangwe bule.

<sup>10</sup> Chila nkanana chenula masulumizo ya file ya Yesu mo mwili wetu, chani ujima wa Yesu, nawo uwonekane mwe mili yetu.

<sup>11</sup> Mazuwa yose ya ujima wetu chahangwa ni file kwachausa cha Yesu, chani ujima wakwe welavyanye mwe mili yetu ikubanika.

<sup>12</sup> Nuko kugamba mndani mwetu file yadamanya ndima, mna mndani mwenyu ujima wadamanya ndima.

<sup>13</sup> Mawandiko Yakukile yawandikwa, “Nasilonga kwaviya nasizumila.” Suwe naswi chikata tinda na moyo uwo wo kuzumila, chazumila, na kwachausa icho chalonga.

<sup>14</sup> Chimanya kugamba Chohile amuuyuse Zumbe Yesu nachuuyuse suwe naswi hamwenga na Yesu na kuchika kulongozi kwakwe hamwenga na nyuwe.

<sup>15</sup> Yose yano ni kwachausa chenye, hata mbazi za Chohile ziwabwila wantu walozize vitendese, ntogozi nazo zongezekelese, kumwinka Chohile ulenguso.

### *Kwikala kwa Kuzumila*

<sup>16</sup> Kwachausa icho hachi kufachevu, na hata uneva mili yetu yakuse neisakale, mna kwa mndani chatendwa wahya zuwa kwa zuwa.

<sup>17</sup> Nkunto chikupata ni ndodo du, naho ya chipindi du, mna naichinke ukuka ujinkile misuhi yose, ulenguso udy hewikusila.

<sup>18</sup> Elo meso yetu hayemwe vintu vikuwoneka, mna hevikuwoneka. Kwaviya vikuwoneka ni vya chipindi du, mna viya hevikuwoneka ni vya mazuwa yose.

## 5

<sup>1</sup> Kwaviya chimanya kugamba wikazi uno chikwikala haluse hano he isi, nuko kugamba mili yetu, aho neibalangwe, Chohile nachinke nyumba ya kwikala kwembingu, wikazi heudamanywe ni mikono ya mntu, wikazi wa mazuwa yose.

<sup>2</sup> Kwaviya mwe nyumba ino chaugula, chika-jelejeza kuviswa wikazi wa kwembingu,

<sup>3</sup> kwa kuviswa hachiwonwe kugamba chimwazi.

<sup>4</sup> Chikatenda chichei mwo wikazi uno wimwe isi, chaila kwa kuminywa, siyo kugamba chaunga chivulwe unwili wa mwe isi ukubanika, mna china msuhi wa kuvikwa udy hewikubanika, chani chiya chikubanika chimelwe ni ujima wa mazuwa yose.

<sup>5</sup> Chohile mwenye nuyo achiikiye ukuhitukila uko, uyo kachinka Muye wakwe atende ukombo mwa yose achinkile suwe.

<sup>6</sup> Elo mazuwa yose hachina woga. Chimanya kugamba kwikala mo mwili uno ni kwikala hale na Zumbe.

<sup>7</sup> Kwaviya chekala kwa uzumizi, siyo kwa kuona.

<sup>8</sup> Mna china moyo mkulu, suwe chawona vyatendile chise kuwona mo mwili na kwikala hamwenga na Zumbe.

<sup>9</sup> Mna mbuli yedi itendese, chaunga chimuwagize, vitende chekala hano he isi hegu uko.

<sup>10</sup> Kwaviya chose chaungwa chichimale kulongozi kwe chigoda cho kukantila cha Kulisito, chani chila mntu ahokele chikumuwagila mwe yadya adamanye mo mwili, mwe viya adamanye kugamba ni vyedi hegu viha.

### *Umbuya na Chohile kujinkila kwa Kulisito*

<sup>11</sup> Elo, suwe chimanya vya kumogoha Zumbe, mna chilavyanywa kulongozi kwa Chohile. Miye nami nina msuhi wa kugamba naho chilavyanywa mwe umanyi wenyu wo kusagula yedi na yehiye.

<sup>12</sup> Siyo kugamba chajeza naho kwelongela vyedi kwenyu. Mna chaunga kuwenka nyuwe viya chikuwona ni vyedi kwenyu, chani muwahitule wadya wakwefenyezesa viya wakwewona ukaleka viya weli mwe myoyo.

<sup>13</sup> Uneva chiwoneka chiwachilalalu, ivyo ni kwachausa cha Chohile, na uneva china fanyanyi zetu zihezize, iyo ni kwachausa chenyu.

<sup>14</sup> Kwaviya suwe chalongozwa ni ungi wa Kulisito, wadya chimanyize kugamba mntu

yumwenga du abanikaga kwachausa cha wose, na ivyo ni kugamba wose wehanga ne file yakwe.

<sup>15</sup> Abanikaga kwachausa cha wantu wose, chani wakwikala wasekwikala kwachausa chawo wenye, mna kwachausa cha uyo abanike, niyo auyuka kwachausa chawo.

<sup>16</sup> Elo, kukongela haluse, suwe hachi kumhima mntu yoyose chimwili. Hata hegu chipindi chimwenga na chimhima Kulisito chimwili, haluse sivyo ivyo naho.

<sup>17</sup> Mntu yoyose analungana na Kulisito atenda chumbe chihya, mbuli za kale zijinka, uhya ubula.

<sup>18</sup> Yose ni ndima ya Chohile mwenye kuchi-ivanya suwe na mwenye kwa sila ya Kulisito, na kuchinka ndima ya kwivanya wantu na uyo.

<sup>19</sup> Nuko kugamba, Chohile, nakeivanya isi na uyo mwenye kwa sila ya Kulisito, akaleka kusinya masa yawo wantu. Uyo kachinka ulosi mwe kuwevanya wantu na yeye mwenye.

<sup>20</sup> Elo, suwe chachimala kumlongela Kulisito. Chohile naye mwenye achijeseza suwe kuwalombezani nyuwe. Chawalombezani kwa hantu ha Kulisito, mwivanywe na Chohile.

<sup>21</sup> Kulisito nendile hana masa, mna Chohile kamtenda ejelwe masa kwa chausa chetu, chani suwe kwa kulungana nauyo, chihangane mwe kusagula yedi hegu yehiye kwakwe kwa Chohile.

## 6

<sup>1</sup> Chinatenda wandima hamwenga na Chohile, chawalombezani msekuzumila chiya wedi mhokele kulaila kwa Chohile chage bule.

<sup>2</sup> Chohile agamba vino,  
“Umo chipindi chizumilwe chabulaga  
sikwetegeleza,  
umo zuwa dya kukuhonya dyabulaga  
nasikwambiza.”  
Tegeleza, chipindi chizumilwe ni chino, zuwa  
dya uhonyi ni haluse!

<sup>3</sup> Hachikunga kutenda nkobadiko mwe mbuli  
yoyose, chani ndima yetu isekufuzumilwa.

<sup>4</sup> Mna chelongela wenye kugamba chindedi  
chi wandima wa Chohile kwa chila chintu, kwa  
ujijimizi ulozize mwe chipindi cha masulumizo,  
madala na nkunto.

<sup>5</sup> Chitoigwa, chifungwa na kuzomwa mo  
lumpe, chidamanya ndima niyo chasokela,  
chicheleza na kwikala na sala.

<sup>6</sup> Chelagisa kugamba suwe chi wandima wa  
Chohile kwa sila ya wedi we myoyo yetu, na  
umanyi wa ujijimizi na wedi wetu, na kwa Muye  
Ukukile, mwe chindedi chetu cho ungi,

<sup>7</sup> kwa ulosi wa chindedi na kwa nguvu ya  
Chohile. Wedi nicho chiziha chetu chi kumuwa-  
gila Chohile cha kwedima kulume na kumoso.

<sup>8</sup> Chatunya na kubelwa, chalongelwa yehiye  
na kulongelwa yedi. Chafanyanywa kugamba  
chiwadanti, kumbe chalonga chindedi,

<sup>9</sup> saviya hewemanyike, kumbe chimanyika  
kwa wose, saviya wabanike, mna sevyo mku-  
wona, suwe chiwajima.

<sup>10</sup> Hata hegu china chinyulu, mazuwa yose  
chelelwa, hata hegu chiwachiwa, mna chatenda  
walozize wagoli, kumbe china chila chintu.

<sup>11</sup> Walukolo uko Kolinto, chitamwila na nyuwe pwilili naho chiwagubwila vidala imyoyo yetu.

<sup>12</sup> Suwe hachichindile imyoyo yetu, mna nyuwe nawo mchindile imyoyo yenyu.

<sup>13</sup> Haluse nalonga na nyuwe saviya hulonga na wanangu, gubulani imyoyo yenyu saviya suwe chiwagubwile iyetu.

*Kanyo dya Paolo mwa Hewezumile.*

<sup>14</sup> Mse kutimilana na wantu hewezumile. Togatani, utana na wihi vyevana chindedi? Ung'azi na chiza vyevana?

<sup>15</sup> Kulisito adaha kwivana na Shetani? Mkanuni ana wivano wani na hezumile?

<sup>16</sup> Nyumba ya Chohile ina wivano wani na matukulu? Kwaviya suwe chi nyumba nkulu ya Chohile emjima. Saviya Chohile mwenye alongile, “Nanike kaya yangu kwawo, na kwikala mwawo. Nanitende Chohile ywawo, nawo nawa-tende wantu wangu.”

<sup>17</sup> Ivyo Zumbe alonga naho, “Mhalawe mwawo, mwenege nawo, mse kukufya chintu chichafu, miye nami naniwahokele.

<sup>18</sup> Miye nanitende Tati yenyu, nanyuwe nam-tende wanangu, wagosi kwa wavyele, alonga Zumbe Chohile Mkulu mta Nguvu.”

## 7

<sup>1</sup> Wambuya zangu hunga, ndagano yose ino ikiwa suwe. Elo chelenguse wenye na uzavu wa mili na muye wetu, chitende wakukise kwa kwikala kwa kumwogoha Chohile.

*Kwelelwa kwa Paolo*

<sup>2</sup> Chigubwileni myoyo yenyu. Hachina masa na mntu yoyose, hachihokile mntu yoyose, hegu kumdanta mntu yoyose.

<sup>3</sup> Sikulonga mbuli zino kwachausa cha kuwakantilani, kwaviya, saviya nilongile kale, nyuwe mwi mwe myoyo yetu, chibanike hamwenga, hegu chitende na ujima hamwenga.

<sup>4</sup> Neduvila nyuwe vidala, nefenya vidala kwachausa chenyu. Sikogoha neduvya heviku-longwa, mwe nkunto zetu zoseni nabweda vidala.

<sup>5</sup> Hata chize chibule Makedoniya mili yetu haihemile. Chila ntendele nachikomana na nkunto, kuse nkumbizi, mndani woga.

<sup>6</sup> Mna Chohile, mta kujela nguvu wahwele, kachijela nguvu kwa kwiza kwa Tito.

<sup>7</sup> Hachijeligwe moyo nu ukwiza kwakwe du, mna naho mwe viya mumjeile moyo. Tito kachigambila viya mkutenda na nkwinu ya kuniwona, viya mkujela mbazi na viya mku-nigombela. Vino haluse nabwedesa.

<sup>8</sup> Kwaviya hata hegu ibaluwa yangu idya si-wajelani chinyulu, sikuwona vikuleka niwone usungu. Hata hegu ni kwa chipindi chidodo du.

<sup>9</sup> Mna haluse nabweda, siyo kwaviya nyuwe mjeligwa chinyulu, mna kwaviya chinyulu chenyu chiwatenda mhitwile viya mkunga chani mweile. Mjelwa chinyulu mo mwalo wa Chohile, na kwachausa icho hachi walumize kwa vyovyose.

<sup>10</sup> Kutenda na chinyulu mwe viya akunga Chohile kwegala hitwilo dya moyo, hitwilo di

kwigala wambulwa, hahana chinyulu. Mna chinyulu cha mwe isi chegala file.

<sup>11</sup> Elo, mkaule chinyulu seicho mwa Chohile kwigaila kuhikiliza vivihi mndani mwenyu, heye, na kwegombela, heye, na kwihiwa, heye, na nkama, heye, na kubesa, heye, na kwekamba, heye na mfundo! Kwa chila sila mwelagisa wenye kugamba hamna masa mwe mbuli iyo.

<sup>12</sup> Hata hegu nasiwandika idya ibaluwa, sidamanye ivyo kwachausa cha yudya adamanye vihiye, hegu kwachausa cha yudya adamanyizwe vihiye. Nasiwandika chani iwonwe pwilili kulongozi kwa Chohile ivyo mwili na kwekamba kwachausa chetu.

<sup>13</sup> Nivyo vikuleka suwe nachijelwa moyo. Siyo kugamba nachijelwa moyo du, mna naho Tito nakachelela kwa chinyemi nendile ananacho kulawana ne ivyo mumsangalaze mo moyo.

<sup>14</sup> Miye seduvila nyuwe mwa meso yakwe, nyuwe nanywi hamnijeile soni. Chiwagambilani ichindedi mazuwa yose, na kudia kweduvila nyuwe mwa meso ya Tito kutenda ulosi wa chindedi ichodu.

<sup>15</sup> Ivyo ungi wakwe mo moyo kwenyu nyuwe wongezekela vitendese akakumbuka ivyo mhezize kwiva, na ivyo mumhokele kwa nkama ziloize na kuzingiza.

<sup>16</sup> Seleleswa kugamba nadaha kuwegamila nyuwe mwe chila ulosi.

## 8

*Kulavya kwa Chisekwesekwe*

<sup>1</sup> Naho walukolo wetu, chawagambilani mbuli za mbazi za Chohile ayenkile mabunga ya wazumizi wa Makedoniya.

<sup>2</sup> Wazumizi wa uko nawajezeswa ni nkunto, mna chinyemi chawo nachikulisa, hata hegu naniwachiwa vidala walavya kwa chisekwe-sekwe vidala.

<sup>3</sup> Nadaha kuwalongela kugamba nendile wana nguvu za kulavya kujinka viya wadahile. Mweviya waungile wenye,

<sup>4</sup> wachilombezesha chitende na ndala mwe ndima ino ya mbazi za Chohile mo kuwambiza wantu wa Chohile.

<sup>5</sup> Hachekiye msuhi hegu nawadamanye saivyo, mna nkongo welavya wowo wenye kwa Zumbe, wakaheza welaviza wenye kwetu naho, mweviya Chohile akunga.

<sup>6</sup> Niyo chamweila Tito awachintizeni mbazi ino kwenyu saviya yeye alongole kuikongela.

<sup>7</sup> Nyuwe nanywi mna chila chintu, uzumizi na semo na umanyi na kuhikiliza kwe simile za uungi mnanawo kwetu. Kutimilana na ivyo mtende na vilozize mwe ndima ino yakutenda na moyo wa mbazi.

<sup>8</sup> Sikulonga vino kwa kuwalagizani. Mna sila ya kuwagambilani mbuli za kuhikiliza kuwambiza watuhu, sunga niwajeze chani uungi wenyu upate kumanyika kugamba ni wa chindedi.

<sup>9</sup> Kwaviya, nyuwe mmanya mbazi za Zumbe dyetu Yesu Kulisito, uyo, hata hegu ana chila chintu, naketenda mchiwa kwachausa chenyu, chani kwa uchiwa wakwe, awenkeni ugoli.

<sup>10</sup> Fanyanyi zangu ni zino, nivyedi mkomeleze yadya mkongile mhilimo wa gulo. Nyuwe na mwi wankongo kuguha nkacho na kunga kudamanya.

<sup>11</sup> Elo, komelezani indima iyo, saviya na mwili na nkwina nkulu ya kwambiza, ivyo damanyanyisani ivyo, viya mkudaha, kukomeleza ndima yo kulavya.

<sup>12</sup> Uneva mntu ana moyo wa kulavya, Chohile ahokela chiya unanacho hakunga chiya hwinanacho.

<sup>13</sup> Sikulonga ayo chani watuhu wabwede, nyuwe mkomwe ni nkunto, mna chiliganye.

<sup>14</sup> Chila mnanacho haluse chongezেকে chiwambize wadya wakuchunga, chani wowo nawo chipindi wakatenda na chongezেকে, wawambizeni nyuwe mwe viya mkunga, na ivyo kutende na kuligana.

<sup>15</sup> Saviya iwandikwe, “Achisanye vilozize hajenjeze, na yudya achisanye vidodo hahungukilwe.”

### *Tito na Wambuyaze*

<sup>16</sup> Na mtogola Chohile aikiye kuhikiliza mo moyo wa Tito kuhikiliza uko nuko ninanako miye kwa kuwambizani.

<sup>17</sup> Siyo du kugamba nakazumila lombezo dyetu, mna naho ana nkwina nkulu ya kwambiza, hata niyo aviwona mwenye kwiza kwenyu.

<sup>18</sup> Hamwenga na uyo, chamsigila mlukolo yumwenga yudya atunyiswe mwe kulonga Mbuli

Yedi ya Kulisito mwe bunga dya wamzumile Kulisito wose.

<sup>19</sup> Ukaleka ayo, uyo kasagulwa ni bunga dya wamzumile Kulisito atende mnyetu mwe ntambo ya kuchintiza ndima ino ya kulavya ntambiko kwa kumtunya Chohile, mbuli chikudamanya kwachausa cha ulenguso wa Zumbe, na kwa kulagisa viya chikunga kuwambiza watuhu.

<sup>20</sup> Chaunga chenege mafuzumo yakudaha kulaila mo kuchimaila ntunyo ino chinkigwe.

<sup>21</sup> Chaungisa kudamanya vyedi, siyo kulongozi kwa Zumbe du, mna naho kulongozi kwa wantu.

<sup>22</sup> Elo, hamwenga na walukolo awo, chimsigila mlukolo mnyetu mtuhu yudya chimjezize nkanana zilozize, nachimwona kugamba ni mta nkwinana nkulu ya kwambiza, hata haluse katenda na moyo ujinkile kwaviya ana msuhi mkulu na nyuwe.

<sup>23</sup> Tito ni mnyangu, chadamanya ndima hamwenga kwachausa chenye, mna kwa wano walukolo weyangu watuhu wakwiza nawo. Awo ni wasigilwa wa bunga dya wamzumile Kulisito, ukulu kwa Kulisito.

<sup>24</sup> Elo, mwelagise kulongozi kwa mabunga ya wantu wa Chohile kugamba chindedi mwa waunga na kuwagambila kugamba chinyemi ninanacho mwenyu ni cha chindedi.

## 9

### *Wambizi kwa Wakulisito Watuhu,*

<sup>1</sup> Havikungwa ni wawandikileni mbuli ya wambizi ukusigilwa kwa wantu wa Chohile.

<sup>2</sup> Simanya ivyo mwili na moyo wa wambizi, naho naseduvya mwenyu mo ulosi mwa wantu wa Makedoniya. Nasiwagamba, “Walukolo wetu wa Akaya wekala vyedi kulavya kukongela mhilimo wa gulo.” Elo, kuhikiliza kwenyu kuwajela moyo walozize wawo.

<sup>3</sup> Elo, siwasigila walukolo wetu awo, chani chinyemi chetu mwenyu chiwoneke kugamba siyo milosi iyodu. Mna saviya nilongile kugamba mwikale vyedi kwa wambizi wenyu saviya nilongile.

<sup>4</sup> Vinase kutenda kugamba wantu wa Makedoniya wakeza hamwenga na miye nachiwabwile hamnati kwemalanya vyedi, aho suwe na chingilwe nisoni ukaleka kulonga soni na mwingile nyuwe wenye kwaviya nachitende chiwaikisa msuhi.

<sup>5</sup> Ivyo, niwalombeze wano walukolo mnilongwele kwiza kwenyu, wemalanye vyedi ntunyo yenyu nkulu mlongile, iyo ilagise chindedi kugamba ni ntunyo ilavigwe du na siyo kwa kukankaliswa.

<sup>6</sup> Kumbukani, “Akuhanda chidodo avuna chidodo, akuhanda vilozize avuna vilozize.”

<sup>7</sup> Elo chila yumwenga, nalavye viya awone, ko moyo na siyo kwa chinyulu hegu kwa kukankaliswa, kwaviya Chohile amunga yudya akulavya kuno kasangala.

<sup>8</sup> Chohile adaha kuwenkani vikujinka viya mkunga, mtenda na chila chintu hata kujinka viya mkunga mazuwa yoseni, na ivyo mjendeleze kwambizana mwe chila ndima yedi.

<sup>9</sup> Saviya Mawandiko Yakukile yawandikwe,

“Alavya kwa untu, awenka wachiwa, wedi wakwe wikale mazuwa yose.”

<sup>10</sup> Chohile akumwinka mlimi mbeyu na nkande, nawenkeni nanywi mbeyu mkunga, na nazitende zihote, zikule na kuwenkani ulozo ulozize mo wedi wenyu.

<sup>11</sup> Chohile nawenkeni ugoli wa chila chintu mazuwa yose, chani wantu wantunye Chohile kwachausa cha ntunyo zenyu wakuhokela kwa mikono yetu.

<sup>12</sup> Kwaviya ndima ino mkudamanya ina ukuka siyo kugamba nayambize yakungwa ni wantu wa Chohile du, mna naho naileke wantu walozize wamhongeze Chohile.

<sup>13</sup> Kulawana na uchindedi ukulagiswa ni ndima yenyu ino, wantu na wantunye Chohile kwachausa cha uchindedi wenyu kwa Mbuli Yedi ya Kulisito mkweila, naho kwachausa cha wedi mkuwenka wowo na wantu wose.

<sup>14</sup> Ivyo na wawalombezezeni nyuwe kwa moyo wose kwachausa cha wedi wa Chohile du awenkileni.

<sup>15</sup> Chimhongeze Chohile kwachausa cha ntunyo yakwe heikulongwa.

## 10

### *Paolo agombela Ndima yakwe*

<sup>1</sup> Miye Paolo mwenye yudya huwoneka siholola hatenda na nyuwe, mna wantu watuhu wagamba nogofya vidala hatenda hale na nyuwe, na wailani kwa mbazi na wedi wakwe Kulisito.

<sup>2</sup> Nawalombezani msekunogoha umo heza, kwaviya nina chindedi nadaha kutendesha mkali kwa wose wadya wakuchifanyanya kugamba chekala chimwili.

<sup>3</sup> Chindedi chekala mwe isi, mna nkondo yetu siyo ya chimwili.

<sup>4</sup> Kwaviya, viziha chikujezeza mwe nkondo yetu sivyo viziha vya mwe isi, mna ni nguvu za Chohile zikubalanga nchinga zose. Chabalanga milosi yose ya udanti

<sup>5</sup> na chikagwisa chila nchinga ya wefenyi wikigwe kuhiga umanyi wa Chohile, chaguha fanyanyi zose na kuzitenda zimwive Kulisito.

<sup>6</sup> Suwe chikala vyedi kukantila chila yumwenga hekwiva, aho mkunga mlagise kugamba mwivisa chila chintu.

<sup>7</sup> Nyuwe mwasinya mbuli kwa kuse du. Uneva eyaho mntu yoyose akufanyanya kugamba uyo ni ywa Kulisito, afanyanye naho kugamba suwe naswi niwa Kulisito saviya uyo eli ywa Kulisito.

<sup>8</sup> Hata hegu songezekela mwe kweduvya mwa udya udahi achinkile Zumbe, udahi wa kuwazenga na siyo wa kugwisa, hata ivyo sina usungu hata hadodo.

<sup>9</sup> Sikunga mfanyanye kugamba naunga niwata-tise kwe zibaluwa zangu.

<sup>10</sup> Mntu adaha kulonga, "Baluwa za Paolo zogo-fya naho zina milosi izamile, mna uyo mwenye akatenda hamwenga na suwe ni mntu asokele, na hata akalonga milosi yakwe ni saviya siyo chintu."

<sup>11</sup> Mntu akulonga ivyo na afanyanye kugamba yadya chikuwandika mwe baluwa umwo chi-

hale, nayo nachitende umo chinanyuwe.

<sup>12</sup> Kwa vyovyose hachajezize kweika hegu kweliganya na wadya wantu wakwetogola wenye. Wantu wakwetenda wowo ni chihimo cha kwehima, na wantu wakweliganya wenye kwa wenye, ni wahezi.

<sup>13</sup> Mna suwe hacheduvise vitendese, kweduvya uko na kusigale mwe chiya chihimo cha ndima chinkigwe ni Chohile, ndima idya chikudamanya kwenyu.

<sup>14</sup> Hachijinkile mihaka kweduvya umo chezaga kwenyu. Suwe nachiwankongo kwiza kwenyu chikawegailani Mbuli Yedi ya Kulisito.

<sup>15</sup> Elo, hachikweduvila ndima wadamanye watuhu kujinka chihimo chinkigwe, mna msuhi wetu ni kugamba uzumizi wenyu nawongezekele mwenyu kutimilana na kihimo aikiye Chohile.

<sup>16</sup> Aho nachidahe kuilonga Mbuli Yedi ya Kulisito mwe si ntuhu, hale na nyuwe, na haitende mbuli ya kweduvya ndima wadamanye wantu watuhu hantu hatuhu.

<sup>17</sup> Mna saviya Mawandiko Yakukile yawandikwe, "Mta kweduvya eduvye mwe yadya adamanye Zombe."

<sup>18</sup> Akuzumilwa suyo yudya akwetogola mwenye, mna yudya akutogolwa ni Zombe.

## 11

### *Paolo na Wasigilwa Wadanti*

<sup>1</sup> Hegu mwani jijimize hadodo, hata uneva miye ni mhezi hadodo! Nijimizani.

<sup>2</sup> Nawawonelani finju mna ni finju ya Chohile, kwa viya nyuwe mwi saviya chigoli ywedi nilom-bile kwa mgosi yumwenga du uyo Yesu Kulisito.

<sup>3</sup> Mna nogoha kugamba, saviya yudya nyoka kwa fanyanyi zakwe za udanti kamdanta Hawa, fanyanyi zenyu zadaha kubalangwa niyo mwauleka uchumi wenyu wa chindedi kwa Kulisito.

<sup>4</sup> Ivyo mntu yoyose akwiza na kuwagambila Yesu mtuhu siyo yudya chiwagambile, nyuwe mwa mhokela kwa mikono midi, hegu mwamzumu-mila muye wivituhu na Muye Ukukile. Mbuli yedi ya Kulisito ivituhu na idya mhokele kulaila kwetu!

<sup>5</sup> Mna sikufanyanya kugamba miye sihungukilwe ni chintu wananacho wakwetanga “wasigilwa wakulu.”

<sup>6</sup> Mafani miye ni mntu hemanyize kulonga, vino sivyo ivyo nili mo umanyi, mna kwa chila ulosi chilavyanywa kwenyu.

<sup>7</sup> Miye silonga kwenyu Mbuli yedi ya Chohile sikunga kulihwa, nasinyanyahala chani niwenu-leni nyuwe. Togolani, nasidamanya masa?

<sup>8</sup> Umo hadamanya ndima mwenyu, nahalihwa ni wantu wa mabunga ya wazumile watuhu. Na henga akuhoka vyawo chani niwadamanyizeni nyuwe.

<sup>9</sup> Umo nani hamwenga na nyuwe simwegamile mntu. Kwaviya awo walukolo wezile kulaila Makedoniya nawaninka saviya nendile haunga. Nahedimisa chani nisekuwegamilani kwa vyovyose viya, naho nanijendeleze kudamanya ivyo.

<sup>10</sup> Saviya chiya ichindedi cha Kulisito chili mndani mwangu, hahali mntu akunga anigubike umlomo mo kweduvya kuno hohose mwe si ya Akaya.

<sup>11</sup> Nalonga vino kwaviya sikuwaungani? Chohile kamanya kugamba nawaungani!

<sup>12</sup> Nichei nadamanya saviya hudamanya haluse, chani nisekuwenka luhenyo wadya wakwetanga “wasigilwa wakulu” kulonda luhenyo, luhenyo lwa kweduvya kugamba hambwe wadamanya ndima saviya suwe.

<sup>13</sup> Kwaviya, awo ni wasigilwa wadanti, wadamanya ndima ya udanti wakwegiliza kugamba ni wasigilwa wa Kulisito.

<sup>14</sup> Naho havikwehela, kwaviya hata Shetani mwenye ezigiliza kugamba ni mndima ywa kwembingu ywa ulangazi.

<sup>15</sup> Ivyo siyo mbuli ya kwehelwa uneva na awo wandima wa Shetani wa kwegamba kugamba wandima wedi. Uhelo wawo nawenkigwe chiya chikuwagila kutimilana na ntendwa zawo.

### *Masulumizo ya Paolo ekale Msigilwa*

<sup>16</sup> Navuzagiza kugamba, mntu asekuensi-fanyanya kugamba ni mhezi. Mna uneva mkafanyanya ivyo, niguhani enga mhezi, chani miyenami nitende na cha kweduvila hadodo.

<sup>17</sup> Ichu hulonga haluse sicho chiya anilagise Zumbe, mwe mbuli ino yo kweduvya, nalonga du enge mntu mhezi.

<sup>18</sup> Kwaviya walozize weduvya kwachausa cha chimntu, miye nami naneduvye.

19 Nyuwe, mna umanyi, nivyo vikuleka mwa wajijimiza wahezi!

20 Mwamjijimiza hata mntu akuwatendani watumwa, mntu akuwankonyani, mnta kuwadidimiza, mnta kuwabela, nakuwatowani moso.

21 Kwa soni nazumila kugamba suwe nachihwa.

Mna uneva kuna mntu yoyose akujeza kwe-duvila chintu, nagamba saviya mntu mhezi, miye nami sikogoha kweduvya.

22 Ivyo, wowo ni Waebulaniya? Hata miye nami ni Mwebulaniya. Ivyo, wowo ni Waizulaeli? Hata miye nami ni Mwizilaeli. Wowo ni welekwa wa Bulahimu? Hata miye nami ni mwelekwa ywa Bulahimu.

23 Wowo ni wandima wa Kulisito? Hata miye nami nalonga ayo chichilalu ni mndima ywa Kulisito kujinka wowo. Miye sidamanya ndima ndala vitendese, sikala kwedijejeza nkanana zilozeze, sitoigwa nkanana zilozeze naho nanihaguhi nakubanika nkanana zilozeze.

24 Nkanana shano sihutwa vibonko milongo mitatu na chenda.

25 Sihutwa na bonkola nkanana ntatu, sitoigwa mayuwe nkanana imwenga, nkanana ntatu sivunikilwa ni meli mwe bahali hayeya mlanga mwa mazi, na umo hacheleza chilo chijima na kusinda msi mjima.

26 Chila nkanana mwe ntambo nani mwe nkondo ya mabohwelo ya makolongo ya mazi, na nkondo za wanyama, na nkondo kulaila kwa Wayahudi weyangu na kulaila kwa wantu sawo Wayahudi, nkondo za kwe mizi, na nkondi za

kumbago, nkondo za mwe bahali, nkondo kulaila kwa walukolo wa udanti.

<sup>27</sup> Sidamanya ndima na kusulumba, sicheleza sina ntongo nkanana ziloziye, sikala nasala na nchilu, siswesa nkande na kwikala mwe mpeho chimbwigili nkanana ziloziye.

<sup>28</sup> Ukaleka matuhu yalozize, chila zuwa nasinywa ni ndima za mabunga yose ya wazumile.

<sup>29</sup> Uneva mntu yoyose kalegela, miye nami silegela, mntu yoyose akakozwamasa, miyenami natenda na nkama.

<sup>30</sup> Haungwa neduvye, naneduvile kuhwa kwangu.

<sup>31</sup> Chohile Tate ywa Zumbe Yesu zina dyakwe ditogolwe mazuwa yose kamanya kugamba sikulonga udanti.

<sup>32</sup> Umo nendile Damesiki, mkulu ywa mzi, endaga hasi ha zumbe Aleta, nendile akaudima umzi wa Damesiki chani anigwile.

<sup>33</sup> Mna sichulupuka mwe mikono yakwe, kwa kwingizwa mndani mwe gahu, niyo naselezezwa kuse kujinkila luhenyo lwa chiwambaza.

## 12

### *Uwoni wa Paolo na Ugubulo*

<sup>1</sup> Neduvya, hata hegu haviwagile. Mna nani-longe mbuli za uwoni na ugubulo ninkigwe ni Zumbe.

<sup>2</sup> Simmánya mntu yumwenga mwa Kulisito, uyo kapwelwa kubula kwembingu mihiliom mlongo na mine ijinkile. Simanyize hegu endaga

eyuko chimwili hegu Chimuye, Chohile kavimanya.

<sup>3</sup> Sivimanya kugamba mntu uyo atende chimwili hegu sicho chimwili, mna Chohile kavimanya,

<sup>4</sup> enulwaga kubula kwe mpepo. Evaga mbuli hezikungwa kulongwa ni mntu.

<sup>5</sup> Elo, naneduvile mwe mntu sauyo, naho siyo mwa yangu miye mwenye, mna kwa yadya yakulagisa usokezi wangu.

<sup>6</sup> Hegu naungile kweduvya satendile mhezi hata hadodo, kwaviya nendile halonga chindedi ichodu. Mna saneduvye, sikunga mntu anifanyanyise mwe yadya akuwona na kwiva kulaila kwangu.

<sup>7</sup> Mna chani nisekweduvisa kwachausa cha kuhokela ugubulo ulozize, sijelwa chintu chikunilumiza saviya mwiwa mo mwili wangu. Chintu icho ni saviya msigilwa ywa Shetani kwa kunitowa na kunichinda nisekweduvisa.

<sup>8</sup> Simweila Zumbe nkanana ntatu kugamba mbuli inilawe.

<sup>9</sup> Mna anigamba, “Wedi wangu uchinta, kwaviya udahi wangu wachinta mo usokezi wako.” Elo nanetunyize usokezi wangu kwa chinyemi chiloize, chani nguvu za Kulisito zikale mwangu.

<sup>10</sup> Ivyo nazumila usokezi, na ubezi, na nkunto, na ubanasi na masulumizo, kwachausa cha Kulisito, kwaviya hasokela natenda na nguvu.

### *Mbuli za Paolo kwa Wakolinto*

<sup>11</sup> Sitenda mhezi, mna nyuwe mnikunkusa kutenda ivyo. Nyuwe mnitunye, kwaviya, hata

hegu miye ni ywabule, kwa vyovyose miye sicho chintu kujinka awo “wasigilwa wa udanti.”

<sup>12</sup> Mpituko na vilagiso na maula vikulagisa pwilili kugamba miye ni msigilwa vyadamanyikaga mwenyu kwa ujijimizi wose.

<sup>13</sup> Namhungukilwa ni chibwani kujinka mabunga ya wazumile matuhu hegu kwaviya miye siwegamileni kunambiza? Ni lekeilani masa ayo.

<sup>14</sup> Haluse sikala vyedi kwiza kwenyu nkanana ya katatu, na saniwenkeni nkunto. Kwaviya icho hulonda siyo ugoli wenyu, mna nyuwe wenye nivyo vikale welesi kuwaikiya wana wawo msuhi, na siyo wana wawaikiye welesi wawo.

<sup>15</sup> Miye naunga kulavya ninanacho, hata kwelaviza imuye mwenye chani niwambize. Togolani, namnunge hadodo hambwe kwa viya miye nawaungisani nyuwe?

<sup>16</sup> Elo, namzumile kugamba siwegamileni. Mna mafani mntu mtuhu nalonge, “Kwaviya Paolo ni mbala, kawadantani.”

<sup>17</sup> Togolani, miye siwakonyani kwa sila ya mntu yoyose ni msigile kwenyu?

<sup>18</sup> Miye nasimlombeza Tito, niyo namsigila kwenyu na mlukolo ywetu mtuhu. Togolani, Tito niyo awakonyani? Togolani, hammanyize kugamba suwe nachikalongozwa ni muye umwenga, na lujendo lwetu ni lumwenga?

<sup>19</sup> Hegu mwafanyanya kugamba kubula vino haluse nachikegombela wenye. Mna, chalonga mbuli zino kwa Chohile, chikatenda chilun-

gana na Kulisito. Mbuli zino zose, walukolo kwachausa cha kuwazenga nyuwe.

<sup>20</sup> Nogoha, ninase kuwabwilani mwe viya sikunga, nami navinunge nitende mwe viya hemkunga. Nogoha kwadaha kukalaila nkumbizi na finju na ulemanyi na uhigani na kulongana vihiye na kulongana kumpezo na kweduvya na lwasu mwenyu.

<sup>21</sup> Nogoha aho hwizila ntambo ikwiza Chohile ywangu na nitende ningile soni kulongozi kwenyu, nami nanilomboleze kwa chausa cha walozize wadya wakoile masa mna haweile mo uzavu na tama zawo zihiye na ugonyi wadamanye.

## 13

### *Makanyo yakukomeleza na Ndamsa*

<sup>1</sup> Ino ni nkanana yangu ya katatu huwatalamkilani. Mawandiko yawandikwa, “Chila mbuli nailiganywe kwa ukuzi wa wantu waidi hegu watatu,”

<sup>2</sup> Silongola ulodu, saviya vyendaga ntambo ya kaidi, haluse nalonga naho hatenda hale, wadya woseni wadamanye masa wakaleka kweila, naho wadya watuhu, hadya hwizila sanitende na mbazi.

<sup>3</sup> Namwewonele wenye kugamba Kulisito alonga mndani mwangu. Kwenyu Kulisito hahwele, mna nguyakwe yadamanya ndima mgati mwenyu.

<sup>4</sup> Elo hata hegu kasulumizwa mo usokezi, mna ekala kwa nguvu za Chohile. Kwaviya suwe naswi chihwa mwa uyo, mna nachikale

hamwenga na uyo kwa udahi wa Chohile kwa chausa chenyu.

<sup>5</sup> Kwehimeni wenye muwone chindedi mna uzumizi. Kwehimeni nyuwenye. Togolani, hammanyize kugamba Kulisito Yesu emndani mwenyu? Siyo kwaviya mdunduga.

<sup>6</sup> Mna nina msuhi kugamba nyuwe nammanyee kugamba suwe hachidunduge.

<sup>7</sup> Suwe naswi chamlombeza Chohile mseku-damanya wavu wowose, mna siyo chani chiwoneke wantu wahumile wavu, mna mdamanye yedi, hatahegu suwe chawoneka saviya wadunduge.

<sup>8</sup> Kwaviya hachikudaha kuhiga uchindedi, udahi chinanawo ni wakujendeleza uchindedi.

<sup>9</sup> Chelelwa kugamba suwe chihwa, mna nyuwe mna nguvu, elo chalombeza mtende watogile.

<sup>10</sup> Elo nawawandikilani ibaluwa ino hatenda ni hale, chani habula uko kwenyu ninase kutenda mogofya kwenyu kwa kutimila udyu udahi aninkile Zumbe, udahi wa kuzenga na siyo wa kuchakula.

<sup>11</sup> Hakomeleza, walukolo, mwikale mpeho, mchume, tozani milosi yangu, mtende wamwenga, ikalani kwa utondowazi. Chohile ywa ungi na utondowazi na atende hamwega na nyuwe.

<sup>12</sup> Lamsanani kwa chilagiso cha ukuka.

<sup>13</sup> Wantu wose wa Chohile kuno wawalamsani.

<sup>14</sup> Wedi wa Zumbe Yesu Kulisito na ungi wa Chohile na umwenga wa Muye Ukukile, vikale na nyuwe wose.

**Lagano hya**  
**The New Testament in the Zigua language of**  
**Tanzania**

copyright © 2014 The Word for the World and Pioneer Bible Translators

Language: Zigua

Contributor: The Word For The World

**Zigua & The New Testament in Zigua**

This translation, published by The Word for the World Bible Translators and Pioneer Bible Translators, was published in 2014.

If you are interested in obtaining a printed copy, please contact The Word for the World Bible Translators at [www.twftw.org](http://www.twftw.org).

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-02-06

---

PDF generated using Haiola and XeLaTeX on 18 Apr 2025 from source files dated 29 Jan 2022

3de16edb-af58-5e1e-a052-fe27295c9b15